


聖

門

志

二



聖門志
(二)

呂善纂輯

聖門志卷之二上

從祀列傳

敘曰。昔孔子稱蘧伯玉爲夫子。決非及門之士。公伯寮愬子路。得罪聖門。去之是矣。左丘明親受業於孔門。爲春秋內外傳。而不在弟子之列。竟居從祀之首。則不可解者。今惟遵依國朝嘉靖九年所定位。次自左丘明至王守仁十七人。從祀東廡。公羊高至胡居仁十六人。從祀西廡。顏無繇至周輔成八人。從祀啓聖祠。林放至范寧七人。改祀於鄉。公伯寮至吳澂十五人。罷祀。懸廡主曹端三十五人。擬祀孔廟。趙岐、孫奭、錢唐三人。擬祀孟廟。俱附之末簡。以備參考。

先儒三十三人。建四。春秋一。周末二。秦一。漢六。隋一。唐二。宋十六。元一。本朝四。山東七。河南五。福

東廡

左丘明山東兗州府汶上縣人。穀梁赤山東兗州府人。高堂生山東兗州府人。毛萇北直河間府人。杜子春河南河南府人。王通山西平陽府人。歐陽

修江西吉安府廬陵縣人。周敦頤湖廣永州府道州人。程頤河南河南府洛陽縣人。張載陝西鳳翔府郿縣人。楊時福建延平府將樂縣人。朱熹南直徽州府婺源縣人。陸九淵

江西撫州府金谿縣人。蔡沉福建建寧府建陽縣人。許衡河南懷慶府河內縣人。陳獻章廣東廣州府新會縣人。王守仁浙江紹興府餘姚縣人。

西廡

公羊高山東青州府臨淄縣人。伏勝山東濟南府鄒平縣人。孔安國山東兗州府曲阜縣人。董仲舒北直河間府景州人。后蒼山東兗州府鄒城縣人。韓愈河南懷慶府修武縣人。

胡瑗南直揚州府如皋縣人。程顥河南河南府洛陽縣人。邵雍北直順天府涿州人。司馬光山西平陽府夏縣人。胡安國福建建寧府崇安縣人。呂祖謙浙江金華府金華縣人。張栻四川成都府綿竹縣人。真德秀福建建寧府浦城縣人。薛瑄山西平陽府河津縣人。胡居仁江西饒州府餘干縣人。

先儒左子春秋。

左丘明山東兗州府汶上縣人。或曰鳳陽府人。楚左史倚相之後。春秋者。魯史記之名也。周室既衰。載籍殘缺。

仲尼思存前聖之業。以魯周公之國。禮文備物。史官有法。故與丘明觀其史記而修之。皆口授弟子。弟子退而異說。丘明恐失其真。乃爲之傳。丘明授魯申。申授吳起。起授子期。期授鐸椒。椒授虞卿。虞卿作抄撮九卷。授荀卿。荀卿授漢張蒼。及賈誼。誼爲左氏傳訓故。授趙人貫公。爲河間獻王博士。貫公授子長卿。長卿授張禹。張禹授尹更始。更始授子咸。及翟方進。胡常。常授賈護。而劉歆從尹咸及翟方進受。繇是言左氏者。本之賈護。劉歆歆白左氏春秋可立。哀帝納之。以問於諸儒。皆不對。歆遂移書責讓太常博士左氏始得立於學官。唐太宗貞觀二十一年。從祀宋真宗祥符元年。追封瑕丘伯。徽宗政和元年。改封中都伯。國朝嘉靖九年。改稱先儒左子。左丘明廟。在陝西平涼府靈臺縣東北二十里。左丘明墓。有二。

一在山東濟南府肥城縣西南二十五里。

一在兗州府嶧縣東北七十里。

先儒公羊子周末。

公羊高、山東青州府臨淄縣人。受春秋於卜子夏。高傳其子平。平傳其子地。地傳其子敢。敢傳其子壽。壽與弟子齊人胡毋子都、趙人董仲舒著以竹帛。子都授東海嬴公。嬴公授同郡孟卿。孟卿授魯人眭孟。眭孟授東海嚴彭祖。魯人顏安樂。故後漢公羊有嚴氏顏氏之學。仲舒以公羊顯於朝。授李育。育授羊弼。弼授何休。休作解詁。其學遂大行。唐太宗貞觀二十一年。從祀。宋真宗咸平三年。加封臨淄伯。國朝嘉靖九年。改稱先儒公羊子。

先儒穀梁子周末。

穀梁赤、山東兗州府人。孔子以春秋之說口授子夏。子夏授穀梁。穀梁作傳。以授孫卿。孫卿授魯申公。申公授瑕丘江公。江公傳子至。至孫爲博士。後周武帝時。江公與董仲舒並。仲舒本治公羊。於是詔太子授公羊春秋。江公之傳。其後寢微。惟魯榮廣。皓星公二人學焉。蔡千秋從廣受。又事皓星公。宣帝卽位。聞衛太子好穀梁春秋。以問丞相韋賢。長信少府夏侯勝。及侍中樂陵侯史高。皆魯人。言穀梁氏本魯學。公梁氏乃齊學也。由是穀梁之學大盛。於是有尹胡申章房氏之學。唐太宗貞觀二十一年。從祀。宋真宗咸平三年。追封襲丘伯。徽宗政和元年。以封爵犯宣聖諱。改封睢陽侯。國朝嘉靖九年。改稱先儒穀梁子。

先儒伏子秦。

伏勝、字子賤。山東濟南府鄒平縣人。縣東北一十八里有伏生鄉。能言書。秦始皇焚書時。伏生爲博士。獨

壁藏之。其後兵起流亡。漢定天下。求其書。亡數十篇。獨得二十九篇。卽以教於齊魯之間。文帝時。求能治尙書者。聞伏生欲召之。時年九十餘。老不能行。於是召太常使掌故晁錯往受之。伏生老不能正言。因言不可曉。使其女傳言教錯。齊人語與潁川異。錯所不知者凡十一二。略以其意屬讀而已。今文尙書是也。伏生作尙書傳四十一篇。授同郡張生。張生授千乘歐陽生。歐陽生授同郡倪寬。寬授歐陽生之子世。世傳至曾孫高。謂之歐陽學。又有夏侯都尉受業於張生。以授族子始昌。始昌傳族子勝。爲大夏侯之學。勝傳從子建。別爲小夏侯之學。故書有歐陽大小夏侯三家並立。迄漢東京。相傳不絕。而歐陽最盛。唐太宗貞觀二十一年。從祀宋真宗大中祥符三年。追封乘氏伯。國朝嘉靖九年。改稱先儒伏子。伏生祠在鄒平縣伏生鄉。伏生書院在鄒平東北一十八里。元時主簿楊溫建。伏生墓在鄒平縣東北一十里。

先儒高唐子漢。

高堂生山東兗州府人。齊公族也。齊卿高敬仲食采於高堂。因氏焉。傳儀禮。漢興高堂生爲博士。傳士禮十七篇。至武帝時。又有禮古經出於魯淹中。而河間獻王好古愛學。收集餘燼。得而獻之。合五十六篇。竝威儀之事。高堂生授瑕丘蕭奮。奮授東海孟卿。卿授后蒼。孝宣世。后蒼最明。戴德、戴聖、慶普皆其弟子。三家立於學官。故儒林傳云。漢興傳禮者十三家。惟高堂生五傳得戴德、戴聖。而禮大明。唐太宗貞觀二十

一年。從祀。宋真宗咸平三年。追封萊蕪伯。國朝嘉靖九年。改稱先儒高堂子。

先儒子國子漢。

孔安國。字子國。先聖十一世孫也。父忠。爲博士。封褒成侯。安國少學詩於申公。受尙書於伏生。年四十。爲諫議大夫。遷侍中博士。漢武帝天漢中。魯共王欲壞孔子舊宅以廣其居。聞金石絲竹之聲。乃不敢壞。於其壁中得所藏古文虞夏商周之書。及傳論語孝經。皆科斗文字。悉以書還孔氏。安國乃考論古今文字。撰衆師之義。凡五十九篇。爲四十六卷。悉上送官。承詔作傳引序。各冠其篇首。定五十八篇。以授都尉朝。而司馬遷亦從安國問故。遷書多古文說。都尉朝授膠東庸生。謂之尙書古文之學。後漢扶風杜林。傳古文尙書。同郡賈逵。爲之作訓。馬融作傳。鄭玄亦爲之註。然其所傳唯二十九篇。又雜以今文。非孔舊本。晉世祕府所存。有古文尙書經文。今無有傳者。至東晉。豫章內史梅頤。始得安國之傳。奏之時。又闕舜典一篇。齊建武中。吳姚興方於大桁市得其書。奏上。比馬鄭所註多二十八字。於是始列於學官。又集錄爲孔子家語四十四篇。會巫蟲事起。不果上。由博士遷臨淮太守。在官六年。以病免。年六十。卒於其家。子孔邛。傳家學。尤善詩禮。孫孔衍。成帝時。爲博士。唐太宗貞觀二十一年。從祀。宋真宗咸平三年。追封曲阜伯。國朝嘉靖九年。改稱先儒子國子。

崇聖書院。在南直鳳陽府盱眙縣治東第一山。舊傳西漢孔安國父子相繼爲臨淮太守。後人因建書院以祀之。上有先聖燕居殿遺址。

先儒毛子漢

毛萇、北直河間府人。善說詩。漢初有魯齊韓三家並立。萇自謂子夏所傳。初子夏作詩序以授魯申。申授李克。克授孟仲子。仲子授根牟子。根牟子授荀卿。荀卿授魯人毛亨。爲詩訓詁。河間獻王得詩傳而獻之朝。時毛萇受亨詩爲獻王博士。每說詩獻王悅之。取詩傳加毛字以別齊魯韓三詩也。故世謂亨爲大毛公。萇爲小毛公。萇所著有毛詩故訓二十卷。詩傳十卷。平帝時立於學官。萇授同國貫長卿。長卿授解延年。延年授徐敖。敖授九江陳俠。俠授同郡謝曼卿。東海衛敬仲受學於曼卿。先儒相承謂之毛詩序。子夏所創。毛公及敬仲又加潤益。鄭衆、賈逵、馬融並作毛詩傳。鄭玄作毛詩箋。至今獨立。唐太宗貞觀二十一年從祀。宋眞宗咸平三年追封樂壽伯。國朝嘉靖九年改稱先儒毛子。毛公書院在北直河間府河間縣尊福鄉。元順宗至正中總管王思誠奏建設山長。毛公墓在河間縣尊福鄉。

先儒董子漢

董仲舒、北直河間府景州人。州西南六十里廣川鎮其故里也。少治春秋。漢景帝時爲博士。下帷講誦。弟子傳以九次相授業。或莫見其面。蓋三年間不窺園圃。其精如此。進退容止非禮不行。學士皆尊師之。武帝卽位舉賢良文學之士。前後百數。而仲舒以賢良對策爲江都王相。復相膠西。兩相驕主皆以禮匡正。凡所著述皆推明孔氏。抑出百家。立學校之官。州郡舉茂才孝廉皆自仲舒發之。年老以壽終於家。家徙

陝西西安府興平縣。子及孫皆以學顯。仲舒所著。皆明經術之意。及上疏條教。凡百二十三篇。而說春秋事得失。聞舉玉杯蕃露。清明竹林之屬。復數十篇。十餘萬言。皆傳於世。元文宗至順元年。從祀國朝。洪武二十九年。追封江都伯。成化三年。改封廣川伯。嘉靖九年。改稱先儒董子。董子書院。在景州西南廣川鎮。元順宗至正中。總管王思誠奏建。設山長。董仲舒墓。在西安府城南六里下馬陵。

先儒杜子漢。

杜子春。河南河南府偃師縣人。縣西南二十五里。有緱氏廢縣。其故里也。通周官。蓋周官是周公所制官政之法。秦始皇深惡之。禁絕不傳。漢時有李氏得周官。上於河間獻王。獨闕冬官一篇。購以千金。不得。遂取考工記補成六篇。奏之。至成帝時。黃門郎劉歆表而出之。周禮始得列序。著於錄略。王莽時。置博士。以行於世。子春受業劉歆。家於南山。因以教授鄉里。明帝永平初年。已九十。猶能誦識。時鄭衆、賈逵往受其業。二子爲發明其說。著周禮解。後馬融作周官傳。以授鄭玄。玄作周官註。皆祖子春焉。唐太宗貞觀二十一年。從祀。宋真宗咸平三年。追封緱氏伯。國朝嘉靖九年。改稱先儒杜子。

先儒后子漢。

后蒼。字近君。山東袁州府郟城縣人。從孟卿受禮。最明其業。在曲臺校書。因說禮數萬言。號曰后氏曲臺記。蒼授沛人聞人通漢、慶普、梁人戴德、及德從兄子聖。西漢世。后氏二戴禮並立於學官。劉向考校經籍。

合二百十四篇。戴德刪其煩重，爲八十五篇，謂之大戴記。戴聖又刪大戴之書，爲四十六篇，謂之小戴記。漢末馬融傳小戴之學，又足月令一篇，明堂位一篇，樂記一篇，合四十九篇。而鄭玄受業於融，又爲之註。故今小戴記與周官六篇、古經十七篇並傳。蒼啓之也。蒼又事夏侯始昌，始昌通五經。蒼亦兼通齊詩，著齊詩故訓二十卷，詩傳三十九卷，授翼奉、蕭望之、匡衡。由是齊詩有翼匡之學。蒼前漢宣帝朝爲博士，官至少府。國朝嘉靖九年，考古求禮，以蒼爲禮之宗，詔令從祀，稱先儒后子。

先儒王子隋

王通，字仲淹，山西平陽府河津縣人。漢徵君霸之後也。世以儒顯。父隆，隋文帝開皇初，爲國子博士。仲淹自幼篤學，慨然有濟蒼生之志。嘗受書於東海李育，學詩於會稽夏瑱，問禮於河東關子明。正樂於北平，霍汲考易於族父仲華，不解衣者六年，乃續詩書、正禮樂、修元經、讚易道。九年而六經大就。隋文帝仁壽三年，西遊長安，見帝。帝坐太極殿，召見，因奏太平十二策。帝大悅，下其議於公卿。公卿不悅，時將有蕭牆之釁，仲淹知謀之不用也，作東徵之歌而歸。累徵不起。僕射楊素甚重之，勸之仕。仲淹曰：「通有先人之敝廬，足以庇風雨，薄田足以具饘粥，讀書談道，足以自樂。願明公正身以治天下，使時和年豐，通也受賜多矣，不願仕也。」煬帝大業末，卒於家。諡曰文中子。生子二：福郊、福時。所著有禮論十卷、樂論十卷、續書二十五卷、續詩十卷、元經十五卷、贊易十卷。正觀初，其弟凝子福時又收其議論，分爲六部，號曰王氏六經。國朝嘉靖九年，從祀，稱先儒王子。

先儒韓子唐。

韓愈、字退之。河南懷慶府修武縣人。後魏安定桓王茂七世孫也。父仲卿。爲武昌令。有美政。終祕書郎。退之生三歲而孤。隨伯兄會。貶官嶺表。會卒。嫂鄭氏鞠育之。年七歲。讀書。日記數千言。比長。盡通六經百家之學。舉進士第。遷四門博士。監察御史。唐德宗時。極論宮事。怒。貶陽山令。有愛及民。民生子。多以其姓字之。歷改職方員外郎。疏論刺史陰黨華陰令。復左遷博士。乃作進學解。以自諭。執政覽之。奇其才。改比部郎中。史館修撰。轉考功。知制誥。進中書舍人。改太子右庶子。歷遷刑部侍郎。時憲宗遣使者往鳳翔迎佛骨入禁中。三日。乃送佛祠。王公士人。奔走膜唄。至爲夷法。灼體膚。委珍貝。騰香係路。退之上表極諫。帝大怒。持示宰相。將抵以死。裴度崔羣爲言。愈雖狂發於忠悃。宜寬容以開言路。乃貶潮州刺史。至潮。問民疾苦。皆曰。惡溪有鱷魚。食民畜產。且盡。民是以窮。乃爲文祝之。是夕。暴風震電。起溪中。數日。水盡涸。西徙六十里。自是潮無鱷魚之患。改袁州刺史。袁人以男女爲隸。過期不贖。則沒入之。退之至。悉計傭得贖所沒者。歸之父母。七百餘人。召拜國子祭酒。遷兵部侍郎。轉吏部侍郎。穆宗長慶四年。卒。年五十七。贈禮部尙書。諡曰文。有原道、原性、師說等篇。皆奧衍宏深。與孟子相表裏。以佐佑六經。宋神宗元豐七年。從祀。追封昌黎伯。國朝嘉靖九年。改稱先儒韓子。

韓文公廟。有二。

一在廣東潮州府治東韓山。宋時建。文公爲刺史時。登覽此山。植木其上。邦人因呼爲韓木。凡科第之

多寡。則以其花之繁稀卜焉。有無亦如之。

一在廣東廣州府陽山縣。

韓昌黎祠。在江西袁州府學右。宋時祖無擇建。因昌黎曾爲刺史。故立祠以祀焉。
尊韓書院。在廣州府連州陽山縣東。相傳韓愈曾讀書於此。後人因立書院。
韓山書院。在潮州府治西南隅。元時郡守王翰建。因韓愈刺史潮州。故立焉。
韓文公墓。在懷慶府孟縣北。皇甫湜爲誌。

先儒歐陽子宋。

歐陽修。字永叔。江西吉安府廬陵縣人。父觀。宋真宗咸平三年。進士及第。爲泰州判官。永叔四歲而孤。母鄭氏守節自誓。親誨之學。家貧。至以荻畫地學書。幼敏悟過人。讀書過目成誦。長游隨州。得韓愈遺藁於廢書簏中。讀而心慕焉。苦志探賸。至忘寢食。舉進士。試南宮第。擢甲科。補西京推官。始從尹洙游。爲古文議論當世事。迭相師友。與梅堯臣游。爲歌詩相倡和。遂以文章名冠天下。入朝爲館閣校勘。仁宗慶曆三年。知諫院。乃爲朋黨論。帝獨獎其敢言。面賜五品服。顧侍臣曰。如歐陽修者。何處得來。時仁宗更用大臣。杜衍、富弼、韓琦、范仲淹。皆在位。增諫官員。用天下名士。永叔首在選中。論事切直。韓琦、范仲淹相繼罷去。修上疏極諫。出知滁州。徙揚州。潁州。復學士。留守南京。遷翰林學士。俾修唐書。奉使契丹。嘉祐二年。知貢舉。加龍圖閣學士。知開封府。唐書成。拜禮部侍郎。兼翰林侍讀學士。五年。拜樞密副使。六年。參知政事。盡

心匡弼。與韓琦策立英宗。與曾公亮考天下兵數。及三路屯戍多少。地理遠近。更爲圖籍。凡邊防久缺屯戍者。必加蒐補。神宗熙寧四年。以太子少師致仕。自號六一居士。五年卒於汝州。年六十有六。贈太子太師。諡文忠。生子發。棐嘗謂漢之文涉晉魏而弊。至唐韓愈振起之。唐之文涉五季而弊。至宋歐陽修又振起之。挽百川之頽波。息千古之邪說。羽翼大道。扶持人心。此兩人之力也。國朝嘉靖九年。從祀。稱先儒歐陽子。

西湖書院。在南直鳳陽府潁州西湖之濱。歐陽修守潁。樂其風土。晚年終老於此。遂築書院。國朝洪武間。淪於河。

歐陽修墓。在河南開封府新鄭縣西二十里。蘇轍爲神道碑。

先儒胡子宋

胡瑗。字翼之。南直揚州府泰州如皋縣人。門人稱爲安定先生。其先世本長安。復居陵州。祖司寇參軍修己卒。葬如皋廬墓。因家焉。父訥。爲寧海節度。在任生翼之。故爲海陵人也。翼之甫七歲。善屬文。年十三。通五經。以聖賢自期待。鄰父見而異之。與其父言曰。後當爲國家偉器。貧甚。無以自給。往泰山。與孫明復。石守道。三人同讀書。十年不歸省。得家書。見面上平安二字。悅而置之。弗視。恐有所牽也。范仲淹薦於朝。以布衣對崇政殿。除湖州教授。倡明道學。一新故習。創名齋署。曰經義者。所以經乎仁義禮樂彝倫之義。明其體也。曰治事者。所以治乎水利兵農算數之事。適其用也。科條備具。以身先之。宋仁宗皇祐五年十月。

召至京師。爲國子監直講。遂居太學。遷大理寺寺丞。嘉祐元年。擢太子中允。充天章閣侍講。國子監請留主太學事。上從之。賜緋衣銀魚袋。士出其門者凡數千。禮部歲所得士。翼之弟子十常居四五。自河汾以後。能立師道。成就人才者。必以翼之爲首稱焉。年六十有七。卒於杭州。諡文昭。葬於烏程之何山。莆陽蔡君謨爲墓誌。廬陵歐陽永叔爲墓表。河南程正叔爲傳。生子三人。長志康。舉進士。志寧。知永州。志正。篤學孝友。國朝嘉靖九年。從祀。稱先儒胡子。

安定書院有二。

一在浙江湖州府治西北。宋理宗淳祐中建。國朝宣德間重修。

一在泰州城西。安定爲師有道。後人仰之。因立書院以祀。

胡瑗墓有二。

一在浙江湖州府城南一十里。

一在如皋縣安定鄉。正統初增築。

先儒周子宋。

周敦頤。字茂叔。湖廣永州府道州人。世居營道濂溪之上。宋眞宗天禧元年丁巳。茂叔生於州之營樂里。幼孤。依舅氏龍圖學士鄭珣。以茂叔有遠器。愛之如子。仁宗景祐三年。奏補試將作監主簿。康定初。授洪州分寧縣主簿。縣有獄久不決者。茂叔至。一訊立辯。慶曆四年。除南安軍司理參軍。移郴縣。桂陽令。皆有

治績。至和元年。遷大理寺丞。知洪州南昌縣。南昌人喜曰。是能辨分寧獄者。吾屬得所訴矣。嘉祐中。改太子中舍。僉署合州判官事。轉殿中丞。六年。轉國子博士。通判虔州。八年四月。英宗登極。遷虞部員外郎。五月。作愛蓮說。是歲。移永州。在永三年。嘗作拙賦。英宗治平四年。攝邵州事。新學校以教其人。神宗熙寧初。呂公著薦爲廣南東路轉運判官。三年。轉虞部郎中。提點本路刑獄。茂叔不憚出入之勞。瘴毒之侵。雖荒岸絕島。亦必緩視徐按。務以洗冤澤物爲己任。竟以此得疾。懇請郡符知南康軍。因家廬山蓮花峰下。前有溪。合於湓江。取營道所居濂溪以名之。築室其上。名曰濂溪書堂。示不忘父母之邦之意。學者宗之。遂號爲濂溪先生。嘗著太極圖。明天理之根源。究萬物之始終。又著通書四十篇。發明太極之蘊。爲南安司理時。通判程珦。使二子顥頤往受業焉。茂叔每令尋孔顏樂處。說者謂其得孔孟之本源。大有功於學者。熙寧六年癸丑卒。年五十有七。葬江州德化縣清泉社蓮花峰栗樹嶺。生子二。熹、燾。皆太廟齋郎。熹官至寶文閣待制。宋寧宗嘉定十三年。賜諡曰元。理宗淳祐元年。封汝南伯。從祀元文宗。至順二年。加封道國公。國朝景泰六年。以裔孫周冕爲翰林院五經博士。世襲。嘉靖九年。改稱先儒周子。

周濂溪祠有四。

一在江西南昌府寧州旌陽山麓。周敦頤主分寧簿時創。以延游學之士。元燬於兵。本朝初。卽其地建景賢書院。至弘治間。提學副使邵寶改名爲祠。始肖像祀焉。

一在江西九江府城南二十五里廬山麓。周敦頤知南康時建。舊名書院。後守潘慈民增築。朱熹爲記。

本朝正統初。江西巡按徐傑。副使焦宏。改祠。肖像其中。

一在湖廣永州府道州學內。宋時建。胡銓爲記。孝宗淳熙中重建。張栻爲記。

一在湖廣寶慶府學。宋時建。朱熹爲記。

宗濂書院。在南昌府。南宋時。江萬里以周敦頤嘗典是邦。有善政。葺宇祀之。扁曰宗濂精舍。元時。移於東湖。改名書院。

太極書院。在順天府城內。元時。中書行省楊惟中建。中祀周敦頤。以程顥、程頤、張載、楊時、游酢、朱熹配享。又刻太極圖通書西銘于祠壁。

道源書院。在江西南安府學東。宋孝宗淳祐間建。中祀周敦頤。配以程顥、程頤。

東山書院。在湖廣寶慶府城東。本朝嘉靖中建。中祀周敦頤。以張九成配享。

濂泉書院。在廣東廣州府城內。宋時建。以祀濂溪周敦頤。本朝正統中重建。學士楊溥爲記。

元公書院。在廣東潮州府學西。元公周敦頤嘗漕運廣東。其孫梅叟爲郡時建。

湘江東院。在廣東韶州府城北帽子峰南麓。宋理宗淳祐間。楊大異建。

三洲書院。在廣東肇慶府德慶州東七十里三洲巖畔。宋熙寧中。周濂溪提刑嶺南。所至洗冤澤民。故皆立書院祀之。

濂溪書院。同名濂溪者有七。

一在肇慶府四會縣治北金鷄山之麓。

一在肇慶府陽江縣學東。

一在南直鎮江府丹徒縣治東南。周濂溪少依舅氏鄭向。嘗居此。後人因建書院。舊在黃鶴山下。本朝正統間。移建於此。

一在江西贛州府贛縣治東三里。周濂溪嘗通判虔州。後人因建書院祀焉。

一在湖廣永州府道州學西。宋時建。理宗賜額。

一在湖廣武昌府學前。舊爲射圃。本朝嘉靖四十三年。改建書院。

一在四川重慶府合州學傍。周濂溪嘗判合州。後人因立書院祀焉。

周濂溪故宅。在湖廣永州府道州西二十里濂溪之上。元仁宗延祐間。州人唐道舉重修。歐陽玄爲記。

周敦頤墓。在江西九江府城南一十里清泉社。

先儒程子宋。

程顥。字伯淳。河南河南府洛陽縣人。十歲能爲詩賦。二十六。舉宋仁宗嘉祐二年進士及第。調京兆府鄠縣主簿。縣南山僧舍有石佛。歲傳其首放光。遠近男女聚觀。晝夜雜處。爲政者畏其神。莫敢禁止。伯淳始至。詰其僧曰。吾聞石佛歲現光。有諸。曰。然。戒曰。俟復現。必先白吾。職事不能往。當取其首就觀之。自是不復有光矣。調江寧府上元縣主簿。有善政。英宗治平四年。移澤州晉城令。專尙德化。在邑三年。百姓愛之。去之日。如失父母。哭聲振野。神宗熙寧二年。改著作郎。尋以呂公著薦。授太子中允。權監察御史裏行。神